



*Jumat, 04 Desember 2020*

**Ogen: Jeremia 39:15-18**



**"IJAGAI DINGEN IKELINI"**



**T**upung Jeremia i penjara i bas kesain pengawal Istana, reh me kata Tuhan bana guna Ebedmelek. Tuhan ersura-sura ncidahkan kuasaNa alu mereken cilaka nandangi kota e. I ja, Dibata erciga ate nandangi ingan si lanai mpehagaken Ia. Tupung Tuhan encilakaken kota e, Jeremia me i je jadi saksi. Tapi man Jeremia nina Tuhan, kam labo iendesken kempak kalak si ibiarindu. Kam terkelin nge erkiteken pengarapenndu itamakenndu man bangKu.

Perkatan Tuhan e mereken kemalemen ate man Jeremia, erkiteken tetap ikawali Tuhan geluhna i tengah-tengah lit ukumen man bangsa si ibiarina. Ertambah-tambah kemalemen ate Jeremia sebab lalap ia ipulahi Tuhan i bas kiniseran si mberat nari. Si enda ilakoken Tuhan erkiteken Jeremia malang man baNa.

Lit nge kalak si ibiari kita entah lit sada si man kebiarenta kal paksa enda? I bas kegeluhenta, megati kita mbiar la ersen, mbiar kerna sekolah anakta, mbiar kerna sinuan-sinuanta ntah pe kerna usahata, mbiar kita la tampil bas jelma sinterem, mbiar kena virus Corona ras sidebanna. Kebiarenta e nggo belinen ngkuasai kegeluhenta asangkan penggejapenta lit Dibata sinjagai kita. Erbage-bage situasi ras kondisita paksa enda erbanca nukah kel kote kinitekenta, tempa-tempa lanai siinget Dibata ras kita.

I bas Minggu adven enda, mari siinget ras si penanam-nanam uga belinna pemere Tuhan ras pengkawaliNa geluhnta. Si kirai ka uga lalana perbahanenta si mehuli man baNa, Emaka si ukuri kerna kerina salah ras dosata i lebe-lebe Dibata. Situhuna, ciga kel ate Dibata nandangi kerina dosata e. Tapi iberekenNa denga kesempatan man banta ngakuken kerina salahta. Bas pengakun salah ras dosata enda tetap nge ijagaiNa ras ikeliniNa kita. Mari dage sipesikap pusuh ngalo-ngalo ketubuhen Tuhan Jesus. Tubuhlah tiap wari Tuhan Jesus e i bas pusuhnta.